

**“Hope in the Hopelessness”**

- Rev.P.M.Sangma

Introduction:

A·gilsak gimik da·alo mai ong·gen angni janggina ukosan nikchaksoengaha, maina sawa agansona man·a knalo mai ong·gen ia a·gilsakna. A·gilsakna da·o namen ka·dongani grigipa aro namen skimbena nanggipa obostao ong·enga. Bangbea ma·gipa-pagiparang dedrangna mikchi rakjaenga, hajalni hajal dedrangrang aro pilak ka·saarang ma·gipa-pagipana gisik be·tokengaha. Iandakgipa somoio an·chingna ka·dongatani banoniko man·gen? Gam·jin, U·ie·ma·siani ba a·gilsaknirangma? Indakgipa somoio manderangni ka·tongo sandiani, *‘Anga a·brirangchiko nichaogen: Angko dakchakani baoni re·bagen? Angko dakchakani Jihovaoni ong·a, Uan salgiko aro a·ako dakaha....’* (Git.121:1-8).

Unigiminsa Daudba agana, *“Ua angni janggiko an·saoata: An·tangni bimungni gimin kakket dakani ramaorango ua angko redila. Oe, anga siani salakimni akongko re·oba, Anga mamung namgijana kenjawa; maina na·a ang baksa dong·a; Nangni monggot aro nangni goldik, uarang angko ka·dimeata. Beben namani aro ka·sae dakani angni janggi tangani sal dipet angko ja·rikgen; Aro anga jringjrotna kingking Jihovani noko dongkamgen”* (Git.23:3-4,6).

**1. Gisik Ra·bo A·gilsaknirang Dikdiksanasan Maina A·a Marang Gnang Ong·aha:**

Isaia 24:5,ff. “Uno donggiparangni ningo aan marang nangatako manaha, maina uamang niamrangko manigija dakaha, sea niamrangko galaha, jringjrotni songgirikaniko peaha” Nambate Isaia 24:4-6, 10-12·ko niate da·o ong·enggipa obostarangara iandakgipa ka·dongani grigipao ong·enga ine gisik ra·gen. Noko napchina nangani gimin Isaia 24:10-12. Maini asel iarang ong·aha? Answer·de **“aan marang nangatako manaha”**.

2 Kor. 4:17,18 “Maina chingni dikdiksana ong·gipa ritchenga dukara bate baten chingna rasongni jringjrotna ong·gipa jrimako ong·atenga. ...nikgiminrang aditanasan ong·a”

Dikdiksa inengon uan minute 1 ba minute 2·ko miksongjaenga, indiba mamingba a·gilsaknirang dong·kamjawa. Uni gimin a·brirangchiko dakchakaniko niatani chongmotn chu·begipa aro bilakbegipa mande ba a·songrangoniko dakchakaniko niate bano ka·dongataniko man·gen?

**2. Gisik Ra·bo Jihova Isol Dingtanggijagipa Ong·a:**

Mal.3:6 “Maina angan Jihova,dintang ong·ani gri; Unigimin O Jakobni dedrang na·simangko bon·atkuja”.

Ibri.13:8 “Jisu Kristo mijalo aro da·alo, aro jringjrotna uan uan”.

“Dakchakani Jihovani ong·a” *“Ua angni janggiko an·saoata: An·tangni bimungni gimin kakket dakani ramaorango ua angko redila”*. Uni bimingni gimin, sani biming Jisuni bimingni gimin ripengrang ia ka·dongani grigipa somoio an·chingni ka·donganiara Jisuni bimingosan ong·na nangenga.

### 3. Gisik Ra·bo Na·a Saksan Ong·ja:

Deut.31:6, “Bilrake kengija ong·bo kennabe, ua uamangna kengoknabe, maina nang baksa reangpagipa nangni Isol Jihovaan, ua nangko jakwatjawa aro nangko watgaljawa”. Da·o ongenggipa obostao namen darangba grie an·ching niknaba gnang indiba Isolni an·ching baksa ong·a.

*Oe, anga siani salakimni akongko re·oba, Anga mamung namgijana kenjawa; maina na·a ang baksa dong·a; Nangni monggot aro nangni goldik, uarang angko ka·dimeata”* (Git.23:4).

⇒ *Namgijana kenjawa – pilak kengnigipa sabisi ba neng·nikanina.*

⇒ *Jihova ang baksa dong·a – Isol pangnaba watgaljawa.*

⇒ *Nangni manggot aro goldik uarang angko ka·dimeata – Isolni kattarango ka·dimeatani.*

Isaiah 40:8 “Sam sikrepa, bibal dimela; indiba an·chingni Isolni katta jringjrotna kingking mangrakgen”

### 4. Gisik Ra·bo Bebera·gipani Sakki Ka·sagrikianian:

*Beben namani aro ka·sae dakani angni janggi tangani sal dipet angko ja·rikgen; Aro anga jringjrotna kingking Jihovani noko dongkamgen”* (Git.23:6). Ka·sagrikiani ia ong·enggipa obostao an·chingni Jisu Kristoo bebera·ani sakkiko a·gilsakna parakani ong·gen.

John 13:35 “*Na·simango ka·sagrikani gnangode uachi pilakan na·simangko angni sninggiparang ine u·igen”*.”

Johan Jisuo bebera·e janggi tanganio badita namroroani uan jongadarangni an·senganina bi·anion ong·a ine aganaha. **3 John 1: 2, “Ka·sara nang·ni janggini namroroa gitan na·a pilakni gimin namrorochina aro an·sengchina anga bi·a.** Da·alo an·chingni bebera·anio an·chingna ka·dongani gri ong·enggipa obostao jongadarangna ka·sae dakani aro bi·chakgrikianian an·chingna ka·dongatani aro Jisuo bebera·giparangni kam. “Aro na·simang maikai dukrangni rengsi ong·pagiparang ong·a, uandake ka·dimeataniba ong·gen ine u·ie na·simangni gimin chingni ka·donga mangraka (2 Kor.1:7).

Bon·atani:

1. Gisik Ra·bo A·gilsaknirang Dikdiksiasanan Maina A·a Marang Gnang Ong·aha
2. Gisik Ra·bo Jihova Isol Dingtanggijagipa Ong·a
3. Gisik Ra·bo Na·a Saksan Ong·ja
4. Gisik Ra·bo Bebera·gipani Sakki Ka·sagrikianian

An·ching da·alo gisik ra·atna a·gilsak dikdiksiasanan, indiba Isol jringjrotnaba dingtangjawa, gisik ra·bo an·ching saksan ong·ja, aro bon·kame an·ching ka·sagrikianian sakki ong·a.